

---

## SAÏL DE SCOLA.

---

**D**E ben gran joy chantera  
S'eu agues razon de que,  
Mas d'amor no m lau de re;  
Ni blasmar no m n'ausaria,  
Tan dopti ma douss' amia :  
E doncs, de que chantarai,  
Pois mal ni ben non dirai?

Per Crist, non o sai enquera,  
Si razos no m n'esdeve,  
Que clams non esta ges be;  
Lauzar! com m'en lauzaria  
S'om lo per que no m fasia?  
Dir o puesc eu, mas ben sai  
Que nul pro d'amor non ai.

Anceis m'es esquiv' e fera,  
On eu plus li clam merce;  
E sai ben per que n'abste  
Mos cors, que non di follia :  
Que meinz val us ans d'un dia;  
Per que m sui mes en assai,  
Si ja'l bon jorn trobarai.

E ja no m'en penedera,  
S'amors no fos tan ab me;  
E donc, quar no tir mon fre?  
Que fols es qui no s chastia;  
Oimais, que m castigaria!  
Que totz morrai o l'aurai,  
Que ja no m'en partirai.

Car a tot dia s'esmera  
Cella qui reten ab se;  
Et ella, de que m rete  
Mas de sa bella paria?  
O ill, mas plus en volria,  
Non ai pro; e qu'en voill mai,  
Pois son bel semblan mi fai?

Deu prec e santa Maria,  
On que NA Biatritz sia  
De Narbona, que ill don jai,  
E ill cresca son pretz verai.